

四庫全書

子部

欽定四庫全書

子部

佛祖歷代通載卷二十二

詳校官給事中<sub>臣</sub>鄧文泮

檢討<sub>臣</sub>何思鈞覆勘

總校官檢討<sub>臣</sub>何思鈞

校對官學正<sub>臣</sub>李巖

謄錄監生<sub>臣</sub>蔣繼勲

欽定四庫全書

佛祖歷代通載卷二十二 元 釋念常 撰

周文王時為柱下史偽第九

第十九化云周文王時老君為變邑子時帝紂荒唐

天下塗炭乃乘飛颶之輪風伯前驅彭祖驂乘降於岐山之陽西伯揖之拜為守藏吏武王克商遷為柱下史作赤精經教文王以仁義之道作璇璣經以授周公成王康王之代世為柱下史昭王時有黑氣之祥老君以八天隱文授昭王王不用後感膠舡之難

辨曰益聞九頭五龍之紀重瞳四乳文之書金秦火漢之文黃魏白晉之典不聞文王師於老子璇璣訓於

周公但云文王師於太公武王師於姬旦羣書具載先  
儒盛談何乃違戾百家別張毛目蓬心瞽唱昧目生靈  
夫欲聖人者宜務其實無稽之談自招世誚案史記列  
傳老子生於定王之世與孔子相接何乃妄為西伯之  
時乎既是聖人見紂荒淫宜盡力規諫匡其不逮而乃  
高乘飛輪棄而遠遁為忠臣者固若是乎昔日過關雇  
徐甲而為御乘薄輦之車今則乘飛颿輪風伯前驅彭  
祖驂乘何自高之不經乎況彭祖此時已歿風伯不肯

前驅文王自公劉以來世積仁孝美化行乎江漢仁慈  
及於行葦何待赤精之教哉周公制禮作樂代臨天下  
設金縢而表誓製周禮而流規何用璇璣之教乎昭王  
時號明君史無黑氣之變妄改白虹之兆而云黑氣之  
言授以隱文又成孟浪之說前云老君為九天教主金  
闕帝君建七曜之冠披九色之帔乘八景玉輿駕五色  
神龍金闕之中坐玉帳之內仙童左奉玉女右陪萬聖  
擁隨千靈翊從老子既有如此高貴之位而不肯居返

就守藏之職屈身為臣侍君之傍立柱之下晨趨暮拜  
端笏搢紳捨喬木之高遷投幽谷之賤地翻上倒下抑  
何謬哉變邑之號周書之所不載金闕帝君爰從道士  
虛張有名無實孰肯傳信栽風求影種電尋根此之謂  
與若以昭王不信故感膠舡之難者秦皇求仙親臨海  
上凌波涉險冀遇神仙虛想安期之名不覩羨門之面  
沙丘道死鮑臭薰人漢武好仙身著羽人之衣口飲天  
表之露縱樂大之詭說信少君之詐術而身入茂陵竟

無一補魏太武任寇謙之說建靜輪天宮費竭人勞終  
感癘疾周武帝口服丹藥身服黃衣熱發晉陽失音而  
死唐武宗師趙歸真餌金丹藥會昌不滿早致崩亡近  
宋上皇信林靈素遊月宮誦太極之章佩驅邪之劔而  
亡國破家身死東韓此之數君皆傾誠一志望享千年  
而遘患彌留竟無一驗譏以膠舡之難不亦妄求人過  
乎幸人有災君子不為也

前後老君降生不同偽第十

第一化云老子生在五運  
之前第二化云老子生在

欽定四庫全書

附錄卷二十二

三

三氣之中第六化云老君姓李諱弘元曜靈字光明以  
上和七年歲在庚辰九月三日甲子卯時始育於北玄  
玉國天崗靈鏡山李谷之間玄靈聖母既誕之夕有三  
日出於東方九龍吐水月妃散花日童揚彩年五歲體  
道凝真二十而有金姿玉顏稟家離親起迹風塵後感  
元始下教授以鬱儀太章太洞真經紫微天帝玉清君  
以瓊輿下迎賜丹璽符書為上清金闕後聖帝君掌握  
十天河海神仙第十一化云老君以清濁元年七月一  
日記玄神玉精降太元玉女千三百年號無上老子一  
號大千法王第十二化云老君以清漢元年寄九天飛  
玄玉女八十一一年號高上老子第十三化云老君以清  
漢元年甲午九月九日降元素玉女七十三年號九靈  
老子第十化云老子以殷十八王陽甲庚寅歲建午月  
入於玄妙玉女口中八十一一年至武丁九年庚寅歲一  
月十五日聖母剖左腋攀李樹而生生即行九步步生  
蓮化九龍吐水具七十二相八十一好左手指天右手



指地曰天上天下唯道獨尊我當闡揚無上道法魯度一切又云李靈飛得修生之道真妻天水尹氏於瀨鄉晝寢見太上從天而下化為玄珠吞而有娠八十年生而皓首曰老子生李樹下指李為姓

辨曰夫星流貫昴實標文命之祥電繞樞星是顯軒皇之慶虹流華渚少昊於是膺期星冠月輪顓頊以之應瑞赤龍曉暎言旌帝堯雲屯鬱蒸實徵漢祖此則聖人神異譜牒具詳未聞老子初生三日共出九步周行月妃散花日童揚彩之事且星隕如雨日有蝕之春秋書之以為異事李耳若有徵瑞孔子何以不記乎且魯陽

揮戈而返日

淮南子鴻烈解

齊景公善言而退煢

劉向新文

貳師拔

劍而泉流

前漢書中

耿恭拜井而水出

後漢書中

苟有奇相書為

美談老既無文事必虛唱倚他大聖取為神奇夫聖人

現相雖有多途託化誕生事無兩體世尊百億化身大

千世界一時頓顯化緣事訖便入涅槃老子隨代降生

以何大謬乎本是李耳妄改其諦李伯陽而云光明隱

其本名而加美號史記真文一詞不錄道書偽說百種

粧填前之兩化說在太易之前後之十重紀在伏羲之

後尋虛撫偽狂惑後人前說五歲凝真二十八道後則  
八十一歲生而皓首自語矛盾何待他攻亳州瀨鄉實  
而不認北玄玉國虛而妄傳聃耳蓬頭謬說七十二相  
野合懷胎謠云周行九步採他釋瑞而為老竒將此薰  
猶亂彼蘭芷北玄玉國山海之所不紀天崗李谷地里  
之所匪詳王儉太尉王儉有百家譜弗聞玉女之名何姓氏  
苑罕說玄妙之族案道士賈善翔高道傳序云伯陽起  
迹於姬周既云起迹於姬周則是老子不在商也明知

陽甲之時本無李耳衰周之際始見老聃

胡曾云七雄戈戟亂如麻

四海無人得坐家老氏却思天竺住便將徐甲過流沙斯則周末時人明矣

避亂入秦死葬

槐里秦佚弔之三號而出斯良證也何更疑哉史記本

傳莫知所終化胡浪語云過流沙將如來降誕之複合

老子過關之氣汝雖巧會偽說孰憑案燉煌實錄云周

桓王二十九年幸閑豫庭與羣臣對論古今王曰老聃

父何如人也天水太守索綏對曰老聃父姓韓名虔字

元卑癯跛下賤胎則無耳一目不明孤單乞貸年六十

二無妻與隣人益壽氏宅上牧猪老婢子曰精敷野合  
懷胎八十一年而生老子生時皓首故曰老君此本實  
跡蔽而不傳偷竊他能欲張老聖家有弊帚享之千金  
斯言信與

三番作佛偽第十一

第三十四化云老君告胡王曰使我弟子為佛汝當師之即使尹喜

變身為佛與胡人為師令作桑門授以浮圖之法說四  
十二章經又云老君至舍衛國自化作佛坐七寶座身  
長百千萬丈徧滿虛空又云老君將欲再整釋教以周  
莊王九年乃於梵天命須陀王老君弟子乘月精託陰  
天竺摩耶夫人胎至十年四月八日右脅降生後入雪  
山修行六年道成類佛陀衆號末年尼至匡王四年解

化太上命昇賈奕  
天為善惠仙人

辨曰夫根深果茂源遠流長虎嘯風生龍吟霧起聖人  
利見皆有深源昔植善因今感妙果我佛世尊三無數  
劫積行累功六度無捨而求菩提棄身命如恒河沙捐  
國城如微塵數莊嚴世界誘掖羣生然後應然燈記補  
迦葉位下生中印託化王宮七步周行指天地而猶貴  
三十二相映日月而爭輝四王捧足出塵寰六年行滿  
而成道現身百億國土說法四十九年播聲教於人天

摧外道於雙樹化緣事畢却返無為應物適時如是示  
現何待老子始化尹喜變身掩他神功矜為己勝佛生  
周昭之代老降定王之朝世隔一十七帝年經三百餘  
祀化已滿於天下教已滿於龍宮家仰仁慈之風國遵  
釋氏之範豈假李耳重整須陀再現援前著後諂誑庸  
愚昔日過關雇徐甲而為從奚有天人侍衛乎乘鹿柴  
車何有七寶之座乎廣顙聃耳焉有萬丈之身乎狡佞  
不經欺賢調聖鯢化為鵬蓋緣自變蛇蛻為雉匪假他

功此皆物理自然陰陽感召待時而發非他使然老子  
自是凡人身為臣子何能別生神聖更使尹喜作佛昧  
自心靈瞎他眼目悖禮慢聖殃報拔舌善惠仙人將登  
八地遇然燈佛受無生記此乃世尊往昔之號既然成  
佛功成果滿化緣事畢入於涅槃遷神常樂之鄉永入  
無為之境豈可作佛事畢更作善惠仙人將後著前一  
何錯亂妄竊不真壞人視聽夫上天雖樂終是輪迴不  
免三災之殃難逃五衰之苦聖人超出生死苦樂兩忘



高超三界之津獨步六塵之表何返歸天上却入囂塵  
雜污我聖人欺謾我大覺此同棄天子之尊嚴慕廝養  
之賤役捨華堂之廣廈悅蔀屋之茅簷汝欣賈奕之榮  
我恥糞土之辱隋大臣楚國公楊素竹絰樓觀見壁間  
畫像問道士曰此何圖也道士對曰老子化胡成佛圖  
素曰承聞老子化胡胡人不受老子變身作佛胡人方  
受是則佛能化胡道不能化何言老子化胡也道士不  
能加答善哉楊素之言此通人之論也若胡人不先知

有佛詎肯受佛之化乎以此考之則印土先有佛矣而

言尹喜作佛老子始變何欺吾門之深乎

樓觀尹喜故宅在關之南

今道士居之仍在

冒名僭聖偽十二

第四十八化云商太宰問夫子曰夫子聖人與孔子對曰聖則丘何敢焉

然則丘博學多識者也太宰曰三王聖者與孔子曰三王善任知勇者聖則丘不知太宰曰五帝聖者與孔子曰五帝善任仁義者聖則丘弗知太宰曰三皇聖者與孔子曰三皇善任因時者聖則丘弗知太宰大駭曰然則孰者為聖孔子動容有間曰丘聞西方之人有聖者焉不治而不亂不言而自信不化而自行蕩蕩乎民無能名焉立疑其為聖人也史志經云孔子在魯老子在周以魯望周之洛陽故在西方蓋指老子為西方聖人

也孔子問禮之時先有猶龍之歎故此指老子也

辨曰夫自銜自媒婦女之醜行不矜不伐聖人之深能是以舜禹功嘉有勲而弗競孔稱孟反孟之猶退厚

而居薄由是美譽播於千秋譙光輝於四海上之所引

具見列子仲尼篇中古今通論以謂此夫子惟佛為西

方大聖人之語也

唐琳法師對太宗之表張丞相作護法論皆引此文佛西方聖人也未

聞老子在周孔子在魯故指老子為西方聖人竊名冒聖欺我何多僭聖人者不仁言乖理者非智且道源之

祖肇起黃帝非干老子老子師容成子演五千文縱然  
說聖不能趕於軒轅既三皇五帝孔子不推為聖返指  
老子而為聖人不亦過乎蓋我世尊功圓萬行果證十  
身流光徧於刹塵分身應於沙界不可以人事測不可  
以處所求實三界之大師是四生之慈父寰中獨步為  
王中之法王出世獨尊為聖中之大聖故能高拱覺場  
威行萬國縱使周公之制禮作樂孔子之述易刪詩卜  
偃之文章端木之言語馬遷之辨博葛洪之該通輔嗣

之玄談左慈之神化並驅馳於域內言未涉於大方可  
為善世之高流難作出塵之聖者案天竺聖方羣賢所  
聚過去諸佛共生於彼後漢西域傳史論文其土則

殷乎中土玉燭和暢靈聖之所降集賢懿之所挺生故

古昔賢能時有往者老子西昇經云聞道今改為乾

有古皇先生善入無為不始不終永存綿綿是以西

行又古本化胡經云我生何以晚泥洹一何早不見釋

迦文心中空懊惱此則老子自指於佛為西方聖人也

又黃帝夢遊華胥之國其國在弇州之西王邵注云此指西方天竺也周穆王時聞西方有大聖人出世心甚懼之乃使造父乘驊騮八駿西上崑崙觀日所沒以厭其氣又西極有化人來能返天易地聖力無方千變萬化不可窮極穆王敬之若神築中天臺以居之化人引穆王神遊斯須之間已如數載又穆王五十二年如來示滅西方有白虹十二道南北通貫連夜不滅王問太史扈多是何祥也扈多對曰西方有大聖人衰相現爾

穆王喜曰朕常懼於彼今無憂矣此則竺乾勝方聖人居彼故得賢王西求化人東來也又張騫奉使西窮河源至於大夏聞雪山南有身毒國其人奉浮圖不殺罰乘象而戰身毒即今印度也此則仁慈之風詳於漢史明也上之所引咸指印度以為西方佛生於彼故指佛為西方聖人豈說洛陽以為西方老子為聖人也又云孔子先有猶龍之歎故此聖德指老子者意欲將孔子一朝問禮之事便為老子弟子孔子曰吾無常師主善

為師三人行必有我師焉故學琴於師襄問樂於襄弘  
問官於剡子入太廟每事問有問稼曰吾不如老農有  
問圃曰吾不如老圃此明孔子虛懷納善汲汲於道爾  
豈有一事便為師焉蓋當時老子為守藏吏掌周公之  
禮典故孔子問之若以問禮便為孔子之師則老農老  
圃亦孔子之師哉必不然矣沽名銜世求為人師君子  
不為也

合氣為道偽十三

第一十三化云老子以周昭王二十三年七月十二日至函關尹喜既見



邀歸本第說道德經二篇五千餘言尹喜叩頭曰願授其要老君曰善乃為解道德之要曰道者謂泥桓泥桓者天德也理在人頭中紫氣下降下至丹田名堵謂脾也脾者中黃太一也黃氣徘徊理中宮萬物之母者謂丹田也丹田元北也居下元中半夜之時一氣下降周旋三宮同出而異名者謂精也一日精二曰汗三曰血四曰液故曰異名玄之又玄者謂左右腎也衆妙之門道可道者謂朝食美也非常道者謂暮為屎此依張道陵解道陵如此說也有無相生謂口與腹也難易相成謂精與氣也此老子授尹真節要也又授尹喜神丹經金液經及八煉九還丹伏火之訣其方云金液還丹仙華流高飛雲翔登天丘赤黃之氣成須臾當得雌雄分亂珠可以騰變致行厨靈童玉女我為夫出入無間天同符真精凝霜善沉浮汝其珍敬必來游又授九丹之名及歌曰圓三五寸一分口四八兩寸唇長二尺厚薄均腹三齊坐垂溫陰在上陽下奔首尾武中問文始七

十終三旬內二百善調勻陰火白黃芽鉛兩  
湊聚輔翼人子處宮得安存去來游不出門

辨曰夫道貴清淨德尚無為恬憺內持謙卑自牧不依  
此道別唱多端唯以行氣運功而為修養失道德之淳  
粹乖自然之妙門虛設巧言妄加穿鑿保丹田為至道  
守兩腎為重玄鄙穢麗浮誑詭閭里王喬羨門之輩非  
好此方白石赤松之流不依此道丹經煉訣不見延年  
服餌食芝罕曾久視周武服丹至啞唐武服丹而早  
亡悞他多少賢良不失樂天之旨既道德真訣理極於

此則道藏餘文不足貴也今之道士更騁淺術或有扶鸞而亂書祇貪夜飲或有驅邪而斷鬼誑人除凶或有拘環牆而內守此謂坐馳或有惜言語而不行此謂痴默或有熊經而鳥引擬彭祖而齊肩或有飲氣而息神効龜鶴而老壽或有運精而上腦謂挽河車或固丹田而內封謂之保養或有合氣而為道父子聚鹿或有奪精而採神男女混雜扣齒謂之天鼓嚙津謂之醴泉呼男根為金莖只圖強勁呼女竅為玉戶潛隱醜名呼童

女為真人呼交構為龍虎嬰兒姪女鈇汞丹爐故曰開  
命門抱真人嬰兒回龍虎戲三五七九天羅地網故張  
道陵黃書云男女有和合之法三五七九交接之道其  
道真訣在於丹田者玉門也唯以禁忌為急不許泄於  
道路道路者屎孔也又道家內朝律云禮法男女至朔  
望日朝師入私房詣師立功德陰陽並進日夜六時當  
立功德不得失內侍之序不得貪外道失中御之道不  
得抄前排後次第之序亦不得嬾醜愛美又云朔望

之際侍師私房情意相親男女交接使四目兩鼻上下  
相當兩口兩舌彼此相對陰陽既接精氣遂通故老子  
云我師教我金丹經使我專心養玉莖三五七九還陰  
精呼吸玉池入玄冥行道平等昇太清此等歌訣義皆  
如是將斯媒媾以為真修不思歸根復命之言維行合  
氣鄙薄之術以此求道枉陷人倫以此超昇終身叵得  
以斯滅罪罪不可亡以斯消災災不可退以斯求福福  
不可生以斯出家家不可出何異蒸砂作飯虛受劬勞

鏡裏尋真終無所獲嗚呼棄驪珠而拾礫幹夏鼎而羨  
糠自悞悞他死沈苦海哀哉哀哉

偷佛神化偽十四

第四十二化老子入摩竭國現希有相以化其王立浮圖教名清淨佛號

末摩尼至舍衛國自化作神從天而降天人侍衛現身  
長百千萬丈又至蜀賓降胡王及王子火不能燒鎔不  
能煮水不能溺胡兵百萬弓矢劍戟一時摧落飛電八  
衝聲如霹靂人馬驚仆北郭先生空中頭贊又至餘支  
國左手擎大山至拘薩羅降伏九十六種外道至迦夷羅  
國左手把日右手把月藏於頭中天地冥暗山飛石裂  
海水逆流山川空行又至于闐闐於南渠山示教胡王令  
尹喜化作金人身長丈六項佩圓光足踏蓮華從空而  
下拜禮老君謂胡王曰此吾弟子與汝為師又留神鉢  
令得法味又於毘摩城地變金色放九色神光偏照塵

沙國土即有赤靈真人中黃丈人太一真君九宮六丁八卦神君青龍白虎散花玉女浮雲而至老君坐七寶座燒百和香奏鈞天樂又有八十餘國諸王妃后皆來聽法留尹喜作佛及鉢於毘摩城却升天去老君又於葱嶺降大毒龍徧歷五天於耆闍山獨木樹下化玉座與王說浮圖度桑門二千五百人受以戒律又六十六化云于闐國毘摩城伽藍是老君化胡成佛之處中有石幢刻記其事云東方聖人號老君來化我國下引八學士議證其事跡

辨曰案後漢西域傳三國志魏隋書西域志

圖六十卷志四十卷

合一百卷  
成西域志

並紀西天五印有佛聖跡或幢或柱咸勒其

事不說老君曾留名字初張騫西來始傳浮圖之號至

於今代國使往還無慮百人並不見老君西化之說古  
谷皇帝西征盡海所到之地唯有佛僧行近西北海有  
一國土城中佛塔森然若林彼國君王唯是和上又唐  
王玄策奉使西行至摩竭陀國於耆闍崛山及佛成道  
處咸述碑銘讚佛聖化未聞說有老君之事上之銘贊在王玄策  
傳又湛然居士扈從太祖西征于闐及可弗叉國越天  
山過雪嶺風化具詳亦未知有老子之事即今照烈大  
王皇帝親弟鎮守西域在尋思干西南雪山之西使命



往還來往不絕除親諮詢老化並云無聞則老子神異道書偽出既非通論何足信哉 欽奉聖旨禁斷道

藏偽經下項

見者便宜收取

化胡經

王浮撰

猶龍傳

聖紀經

西昇經

出塞經

九天經

赤書經

上清經

南斗經

玉緯經

紀勝賦

辨仙論

梁廣

斷邪論

三破論

齊人張融假托他姓

明真辨偽論

吳筠

太上寶錄

十山論

青陽宮記

玄九內傳

帝王師錄

三天列記

十異九迷論

傅奕呂  
玄卿

歷代應現圖

佛道先後論

欽道明證論

唐員  
半千

輔正除邪論

吳

辟邪歸正論

杜光  
庭

十二虛無經

藏天隱月經

赤畫度命經

樓觀先生內傳

謗道釋經

林靈素杜光庭  
撰造破大藏經

三教根源圖

金天長觀  
李大方撰

歷代帝王崇道記

高上老子內傳

靈寶二十四生經

混元生三清經

五公問虛無經

混元皇帝實錄

聖旨就大都大憫忠寺焚燒道藏偽經除道德經外盡  
行燒毀遂命大都報恩禪寺林泉倫長老下火謝恩畢  
拈香云佛心天子憫衆生恐墮三途邪見坑个裏了無  
偏黨處就中朱紫要分明所以道聖鑑無私天機莫測  
既來頌德敢不酬恩此香端為祝延大元世主當今皇  
帝聖躬萬歲萬歲萬歲伏願金輪與法輪同轉福越  
三祇舜日共佛日齊明壽延億劫次舉火云憶昔當年  
明帝時曾憑烈焰辨妍媸大元天子續洪範顯正摧邪

誰不知嗟乎道教陰靈佛書自古至今造訛捏偽盜竊  
釋經言句圖謀貝葉題名謗毀如來賊誣先聖醜辭惡  
語何可言哉無蒂狂談實難徧舉始自張陵杜撰不遵  
老氏玄言謬作醮書兼集靈寶詐道從空而得妄言太  
上親傳用三張鬼法以誑惑愚夫設五運神符而魘奸  
匹婦以此觀之葛孝先徒搜要妙陶弘景謾述浮辭杜  
光庭白拈巧偷刼賊無異陸脩靜外好裏弱說客何殊  
若非喫苦不甘爭肯說長道短鮑靜被誅猶可王浮招

報非輕傳奕姜斌不堪齒錄張生焦輩何足言論寇謙  
之口舌瀾翻損他利已林靈素機謀諂詐敗國亡家毀  
人祖兮定遭一時之辱滅賢良兮必招三世之殃因果  
無差報應有準嗚呼悲法琳不遇而遭貶嗟道世雖再  
而難為致令釋子傷心幸得皇天開眼恭惟我大元世  
主聖明皇帝陛下闢邪歸正去偽存真恐衆生永墮迷  
津令萬姓咸登覺路雪冤已竟感謝皇恩粉骨碎身莫  
能酬報遂以火炬打一圓相云諸仁者只如三洞靈文

還能證此火光三昧也無若也於斯會得家有北斗經  
枉教人口不安寧其或未然從此灰飛煙滅後任伊到  
處覓天尊急著眼看至元十八年十月二十日大都報  
恩禪寺林泉長老從倫奉勅下火

對道士持論師德一十七名

燕京 圓福寺長老從超 奉福寺長老德亨

藥師院長老從倫 法寶寺長老圓省

資聖寺統攝至溫 大名府長老明津

薊州 甘泉山長老本璉 上方寺長老道雲

灤州 開覺寺長老祥邁

北京 傳教寺講主了詢

大名府法華寺講主慶規

龍門縣抗講主行育

大都 延壽寺講主道壽 仰山寺律主相叡

資福寺講主善朗

絳州唯識講主祖珪

蜀川講主元一

餘如本論

丁亥閏二月詔行至元鈔以一准中統之五

戊子正月二十一日大赦

至元二十五年正月十九日江淮釋教都總統嘉禾揚喇勒  
智集江南禪教朝覲登對宣上竺出班聖旨問講何經  
答云法華經次問仙林講何經奏云百法論即就退位  
而立引問徑山雲峯和上云禪以何為宗奏對云禪也  
者淨智妙圓體本空寂

泉總統譯  
云再說

復奏云非見聞覺知

之所可知非思量分別之所能解又傳聖旨令更說復



奏云禪之為宗西天四七唐土二三自迦葉付之阿難  
阿難傳之商那和修商那和修傳之優波鞠多由是展  
轉而至二十八祖菩提達磨菩提達磨即東土之初祖  
也祖得法後大破六宗之邪望東震旦國有大乘根氣  
航海而來見梁皇一語不契遂折蘆渡江至少林山中  
面壁九年得二祖神光斷臂立雪祖問當何所求光云  
我心未寧乞師安心祖云將心來與汝安光云覓心了  
不可得祖云與汝安心竟光得傳心法後傳之三祖三

祖傳之四祖四祖傳之五祖五祖本一栽松道者四祖云  
汝已年老可再來吾當忍死以待五祖遂至濁港江頭  
見一女問投宿而受孕托生謂之黃梅無姓兒既而傳  
法於五祖黃梅法席七百高僧獨神秀上座為上首祖  
以傳衣法時至令各述一偈秀即書壁間云身是菩提  
樹心如明鏡臺時時常拂拭莫待惹塵埃五祖云此偈  
亦未見性蓋其尚滯名相未脫知解正在學地傳聖旨  
云再舉一遍復舉畢又奏云盧行者時在碓坊為衆負

春五祖已知其素有悟門盧行者本不識字遂倩人書  
一偈於壁間秀師所書偈側云菩提本無樹明鏡亦非  
臺本來無一物何處惹塵埃乃開析云老盧此偈至本  
來無一物處即是空諸所有徹法源底五祖即於夜半  
密付其衣法盧得衣鉢宵遁至大庾嶺頭為明上座追  
及盧即置衣鉢於石上云不可以力爭明乃盡其神力  
鉢不能舉明乃云本為法來非為衣也祖云不思善不  
思惡正恁麼時如何是明上座本來面目當下大悟秀

歸河北自稱六祖然而知解未亡猶滯名相故流於相  
宗是以教盛西北能受正傳於曹溪是以禪盛東南謂  
之南能北秀此教禪所由分也自是曹溪傳之南岳懷  
讓讓本觀音大士分身讓傳之馬祖謂之馬駒踏殺天  
下人馬祖傳之百丈於侍立舉掛拂處親遭一喝當下  
悟去直得三日耳聾百丈對黃蘗舉此一喝黃蘗不覺  
吐舌亦於言下洞明此喝之旨後臨濟至於黃蘗三度  
問佛法大意三遭六十痛棒後於大愚席下舉前話云

過在什麼處愚云黃蘗得與麼老婆心切相為更覓過  
在濟大悟遂於大愚肋下築三拳愚云汝師黃蘗非干  
我事臨濟歸黃蘗便與三掌自是流通此喝謂之臨濟  
入門便喝此喝之所由生也所謂德山棒者即周金剛  
泉總統聖旨云如何是周金剛奏云德山本姓周為金  
剛經座主滿車載疏鈔遊南方直欲搜破魔子窟宅當  
恁麼時甚生氣槩於途中遇賣油糍婆子買油糍點心  
婆云汝是講金剛經座主經中有一段義若答得白喫

油糰不要錢遂問過去心不可得現在心不可得未來心不可得三心中點那箇心座主無對古云假饒講得千經論一句臨機下口難信知不能徹法源底則滿車之疏皆長語也後見龍潭於侍立次遇夜深辭去見外面黑潭遂度紙燭與之德山方接得潭便吹滅當下大悟次日示衆云窮諸玄辨若一毫置於太虛竭世樞機似一滴投於巨壑自是據條白棒佛來也打祖來也打此無他恐後人滯於名相凡有所問至支離處便與一

棒此棒之所由生也所謂德山入門便棒臨濟入門便  
喝夫棒喝者豈徒施也哉奏至此遂奏云臣僧不敢多  
談恐瀆聖聽傳聖旨但說不要怕又非姦偷屠販之事  
遂進奏云釋迦牟尼世尊初生下時周行七步目顧四  
方一手拍天一手拍地云天上天下唯我獨尊所謂獨  
尊者非為金輪王位之尊所可尊者我也道也法也心  
也正欲啓奏雲門大師一棒公案以為佛祖雪屈  
時靈隱長老淨伏牽衣云勿舉此話遂轉語云四十  
九年三百餘會所說之法無非觀根逗教如一雨普沾

三草二木各隨其根器之大小而為之發機末後云始從鹿野苑終至跋提河於是二中間未嘗談一字既是四十九年說法因甚麼不談一字正恐後人滯於名相不離知解所謂不談一字者熾然常說以無說之說是名真說又於靈山會上百萬衆前拈起一枝花普示大衆獨有迦葉破顏微笑世尊云吾有正法眼藏涅槃妙心分付摩訶大迦葉謂之教外別傳傳此心也印此法也達磨西來不立文字直指人心見性成佛傳此心也



卽此法也奉聖訓垂問云那講主看他長老所說教外別傳底是耶非耶上竺出對云是是又仙林出云南方衆生多是說謊所以達磨西來不立文字正恐伶俐的說謊貪著語言文字故有直指之語又奉聖旨宣進榻前同仙林賜坐謝恩畢就坐傳聖旨云持論仙林云始從鹿野苑終至跋提河於是二中間未嘗談一字既是不談一字五千餘卷自何而來答云一代時教如標月指了知所標畢竟非月林云汝禪宗得法有多少人答

云從上佛祖天下老和上盡恒河沙莫窮其數林云即  
今是誰答云當面蹉過林云在什麼處答云含元殿上  
更覓長安林無語又傳聖旨令泉總統問那講主問底  
是甚言語林答問他禪宗得道多少人他云恒河沙數  
又傳聖旨汝講主家莫看面皮何得向遠遠說來林遂  
問如何是禪答以手打一圓相林云何得動手動脚答  
云只這一圈子便透不過說甚千經萬論林無語又奉  
聖旨云俺也知你是上乘法但得法底人入水不溺入

火不燒於熱油鍋中教坐汝還敢麼答云不敢奉聖旨  
為甚不敢奏云此是神通三昧我此法中無如是事又  
傳聖旨如何都無輸贏林云道不敢便是輸遂斥林云  
不妨會得好林無語乃體聖意奏云夫禪之與教本一  
體也禪乃佛之心教乃佛之語因佛語而見佛心譬之  
百川異流同歸於海到海則無異味又如我萬萬歲皇  
帝坐鎮山河天下一統四夷百蠻隨方而至必從順成  
門外而入到得黃金殿上親觀黃金面皮方謂到家若

是教家只依語言文字未達玄旨猶是順成門外人又如禪家未得徹證未得頓悟亦在順成門外謂之到家亦未可也皇情大悅遂以龍袖西拂即謝恩下殿奉御領歸寢殿賜食

己丑正月抄數戶計 庚寅九月日大赦

辛卯五月二十三日詔改按察司曰肅政廉訪司

癸巳十月二十二日大赦

至元三十年杭州徑山雲峯和上示寂師名妙高福之

長溪人父諱鼎家世業儒母阮夢池上嬰兒合爪坐蓮  
華心手捧得之覺而生師因名夢池神采秀徹嗜書力  
學尤耽釋典固請學出世法父母以夢故不能奪俾從  
吳中雲夢澤公受具戒師銳意求道首參癡絕冲冲曰  
此兒語纚纚有緒吾宗瑚璉也尋又見無準於徑山準  
尤器愛擬以侍職處師嘆曰懷安敗名吾不徧參諸方  
不止也遂之育王見偃溪即請入侍室掌職歲鑰一日  
溪舉譬如牛過窓櫺頭角四蹄俱過了因甚尾巴過不

得師劃然有省答曰鯨吞海水盡露出珊瑚枝偃溪可  
之會師遷南屏攜師與俱尋住宜興太廬遂為嫡嗣遷  
保安江陰教忠雲川何山雲衲四來三堂皆湓蔣山虛  
次直指僉議無以易師朝旨從之歷十有三載衆踰五  
百德祐乙亥寺被兵革軍士有迫師求金者師曰此但  
有寺有僧無金與汝俄以刃擬師師延頸曰欲殺即殺  
吾頭非汝礪刀石辭氣雍容了無怖畏軍士感動擲刀  
去丞相伯顏公見師加敬舍牛百齋糧五百寺賴以濟

顏公又戒諸將此老非常人比宜異目待之以故寺得無恙至元庚辰雙徑延請師懇辭再三乃前寺罹回祿草創纔什一師悉力興建且捐衣孟自為僧堂衆寮不十年悉復舊觀戊子春魔事忽作教徒譖毀禪宗師聞之嘆曰此宗門大事吾當忍死以爭之遂拉一二同列趨京有旨大集教禪廷辨上問禪以何為宗師奏淨智妙圓體本空寂非見聞覺知思慮分別所能到宣問再三師歷舉西天四七東土二三達磨諸祖南能北秀德

山臨濟棒喝因緣大抵教是佛語禪是佛心正法眼藏  
涅槃妙心趣寂上乘孰過於禪詞指明辯餘二千言又  
宣進榻前與仙林諸教徒返復論難林問禪宗得法幾  
人師云從上佛祖天下老和上盡恒河沙莫窮其數林  
云只這是誰師云含元殿上更覓長安又問如何是禪  
師打一圓相林不省師曰只這一圈透不過說甚千經  
萬論林辭屈上大說衆喙乃熄禪宗按堵如初陞辭南  
歸示衆云我本深藏岩竇隱遁過時不謂日照天臨難



逃至化又云衲帔蒙頭萬事休此時山僧都不會徑山  
輪奐甫備延燎復盡師謂衆曰吾負此山債耳遂竭力  
再建滙殿坡為池它屋皆易置佳處五年而成癸巳六  
月初小叅訓飭學者十七日書偈而逝師生於嘉定己  
卯二月十七日壽七十五臘五十九葬於寺西之居頂  
庵

甲午至元三十一年上崩

世祖皇帝潛龍時出征西國好生為任迷徑遇僧開途

受記由是光宅天下統御萬邦大弘密乘尊隆三寶  
帝潛龍時命忠書記叩六丁之靈求治國之道出征江  
南書記奏云飛龍之時已至可速回轅上然之由是  
富有天下

帝問帝師云施食至少何能普濟無量幽冥帝師云佛  
法真言力猶如飲馬珠

帝迎旃檀瑞像歸內宮安奉萬歲山仁智殿為見世之  
寶

帝嘗問帝師云修寺建塔有何功德帝師云福廕大千  
由是建仁王護國寺以鎮國焉

帝命帝師齋竟天雨金花繽紛而下帝云何故有此祥  
瑞帝師云陛下心花內發天雨金花讚歎

帝命巴延丞相攻取江南不克遂問丹巴師父云護神  
云何不出氣力奏云人不使不去佛不請不說帝遂  
求請不日而宋降

定光佛塔毫光發現帝命開視內有舍利光耀人目由

是重建寶塔

蜀僧元一遊西天回朝帝帝問云西天佛有麼元一奏云當今東土生民主何異西天悉達多

元一以西天琢成玉石佛像獻帝帝寶之於萬歲山供養

元一以西天貝多葉經獻帝帝貯以七寶函嚴加信仰忠書記僧中之傑帝命以三奇之道為輔出號施令帝加信任封為太保

元一自西天持佛如來鍤鉢獻帝帝悅寶之以鎮庫藏  
帝與帝師坐次一亢二僧侍側帝云何不遊戲三昧亢  
以一年小云從小至大為次一遂云海青身至小天  
鵝身至大海青徹天飛天鵝生懼怕亢云猪狔身至  
小象王身至大象見狔來欺擲向大千界帝師云我  
以大千界化為一金竈煮你四件物大小都容了帝  
大悅

帝問元一云孔老徒衆何以至少如來徒衆何以至多

元一奏云富嫌千口少貧恨一身多

帝問揀壇主云何處有佛揀奏云我皇即是佛帝云朕如何是佛揀云殺活在於手乾坤掌上平

帝問彌陀和上云和上住在何處奏云住在我王神州帝云恁麼則時時見彌陀

帝問僧元一云和上還涉世緣麼奏云不知法故犯知法了應無

帝問帝師云僧中還有通古今事底麼時有因和上奏

云法自漢明帝至以火辯真偽帝云古今事且置今  
再以火辯真偽時如何因奏云我皇有護法之心此  
經爭得焚燒帝悅其言

帝誕生太子詔海雲國師摩頂立名奏云世間最尊貴  
無越於真金

帝命東宮園場齋帝師作懺悔帝師云衆生度脫盡仁  
王悲願深

帝設資戒大會隨處放光帝問帝師云光從何處來帝

師回奏云感應道交佛光應現

帝命皇后娘娘鎮國寺行香后問衆僧云諸處放光此處何無言訖定光塔上毫光燭天終日不散

帝以衆緣女圍繞帝師帝問云還也動心麼帝師云目前雖可看爭奈老僧何帝大悅

帝問淵總統還有眷屬無回奏云終日不曾離又問還餐酒肉無淵奏云鉢于盂常染腥膻味帝云好老實人新築京城監築者謀毀海雲國師塔兩雉相合奏帝欲



去其塔帝云海雲高僧築城園之貴僧之德千古不磨

帝一日曰旃檀瑞像現世佛寶當建大利安奉庶一切人俱得瞻禮乃建大聖壽萬安寺

帝命寫金字藏經卷軸前圖像未定帝云此經是釋迦佛說止畫說主庶看讀者知有所自

帝詔遍天下每一歲中行布施度僧讀大藏經隨處放光現瑞禎祥不一

帝詔講華嚴大德於京城大寺開演彰顯如來之富貴

帝設大會七處放光顯示華嚴七處之玄旨

帝問衆臣僚每日還不放閑也無衆臣僚無對帝乃袖中出數珠示之内外百官皆歸至善

釋迦如來住世七十九年帝至七十九歲乃云與佛同壽不為夭矣

帝詔十高僧內殿供養帝端居不動諸大德亦復默然

帝乃云此是真實功德

帝詔僧大內念經行香侍臣奏云僧多有不識字帝乃云但教舒展拭去塵埃亦有功德

糠禪背杖戒身見帝帝問曰此杖何為回奏云身有過失以杖責之帝曰過失在心鞭身何益與其責身莫若責心

帝見僧有過不加王法止令閱教懺悔

帝詔東昌大師演教帝大悅賜以寶玉拄杖

帝平宋已彼境教不流通天下揀選教僧三十員往彼說法利生由是直南教道大興

帝建大聖壽萬安寺帝制四方各射一箭以為界至帝大內皆以真言梵字為嚴飾表行住坐卧不離捨佛法也

帝賜講人紅僧衣令說法人與佛齊等

蜀僧圓證見帝帝問汝何所習回奏云幼明三奇長習佛乘上悅賜以碧玉香鼎命崇香火

帝萬幾之暇自奉施食持數珠而課誦

帝建大聖壽萬安寺成兩廊擬塑佛像監修官聞奏帝云不須塑泥佛只教活佛住

帝駕北征護神現身陣前怨敵自退

廣濟大師皇宮親侍日久禮誦不輟帝深賞讚賜以放光佛像命敬侍供養

帝問相士山水士奏云善惡由山水所主帝問太行山如何相士奏云出姦盜帝云何以夫子在彼生帝召

僧圓證問云此人山水說得是麼證回奏云善政治天下天下人皆善山水之說臣僧未曉帝大悅

實刺下桑結大師志慕出家帝從其請落髮為僧賜七寶數珠命供日課

帝詔蜀僧圓證明六神之術上曰髡髮恐無靈驗回奏云此六者天地日月水火之神菩提場中各說偈讚佛得大解脫門為華嚴之嚴衛僧人昭事神必欽依髡髮無傷帝然之

帝詔元一與道士持論元一攻其竊釋孔之言上悅  
帝問僧佛牙真偽僧無對帝云真偽自分明諸人休錯  
解

帝命僧念無量壽王陀羅尼經能念者賜足帛稱賞

帝召東宮云海雲是汝師居住金田宜加崇飾由是鼎  
新慶壽大利

帝出郊狩南花園云此處宜建梵刹段相依命修造出  
狩回駕寺已周圓

帝顯正摧邪命除道德經外餘皆焚毀以絕其妄宰臣  
奏分揀道藏檢出馬湘詩云樹連滄海水連雲昔有  
殷周李老君人說是非皆不定五千言外更無文符  
合上意龍顏大悅制焚之

帝頒行玉音詔昊天講主云聞朕在世誠約學徒究明  
佛法毋令減滅

我唐晉賢道場缺大藏經命張大師徑從驛騎遞相迎  
送佛法流通福覃西蜀上都道士等奏與釋教定邪



正帝云勝負如何賞罰道士云義墮者斬首帝曰不然義墮者削髮為僧

宋主以王位來歸學佛修行帝大悅命削髮為僧寶馬聖安寶長老送瑞像至內心不之悅帝云此是皇家佛汝心何懊惱帝回與三十二錠白金以表三十二相也

宋太后削髮為尼誦經修道帝深加敬仰四事供養帝宣宋室二宮人至皆祝髮為尼帝云三寶中人也命

歸山學佛修行供送衣糧

帝設無遮會詔信講主說總聖名目帝云既號無遮云何有數

宋主毳衣圓頂帝命往西土討究大乘明即佛理

帝以金為泥命僧儒繕寫大藏經

缺

貯以七寶琅瑤

流傳萬世

帝設資戒大會避使長為僧之人使見認得欲取帝叱云已為佛弟子誰復能為主

天竺進鉢帝取食前珍味碎置鉢中內外侍從數滿千人各賜一粒晉令得沾如來鉢中之禪悅

帝至香山山半有泉問僧此泉足僧用否僧回奏云日供一千僧流注尚無竭賜白金一錠命築亭蓋覆貴其利濟

宋鎮庫旃檀方圓丈餘帝曰鎮庫無益刻為佛像利益人天

帝駕至香山栗園其栗方熟左右從駕萬人餘帝誠諭

云此為三寶物一个不容拈

僧衆遠迎帝駕帝曰往日僧人三詔不起今日僧人云何遠迎僧無對

帝設大會闍黎佛聲響亮帝曰如是佛音聲多少衆生  
生善心乃賜白金一錠

弘法寺藏經板歷年久遠命諸山師德校正訛謬鼎新  
嚴飾補足以傳無窮

帝一日云三人護法二已去了惟朕一人當令佛法愈

隆愈盛

帝命逸林上師譯藥師壇法儀軌為天下消八苦之災  
增無量之壽

帝設十萬僧會命十師對御說法賜白金十錠玉拄杖  
十條

外邦貢佛舍利帝云不獨朕一人得福乃於南城彰義  
門高建門塔普令往來皆得頂戴

帝命高僧重整大藏分大小乘再標芳號徧布天下

帝一統天下外邦他國皆歸至化帝印大藏三十六藏  
遣使分賜皆令得瞻佛日

帝命帝師云去佛遙遠僧戒全虧可選諸路高僧賜紅  
黃大衣傳授薩婆多部大戒

帝云菩薩戒本但解法師語者皆得傳受乃印造一千  
部流通散施普令大地衆生皆奉如來寶戒

帝問揀壇主云何處為最上福田回奏云清涼帝云真  
佛境界乃建五大寺為世福田

帝於五臺運工建寺有澗無水興工之日段張沿澗覓水突然涌出給濟不乏

臣佐奏以天下僧尼一例同民帝問民籍若干府庫若干奏云不知上曰輔相治道固宜用心此乃不理而急於食菜餽之僧人其事乃止

帝聞五教義帝云頓教即心是佛諸佛境界凡夫不修如何得到

帝見西僧經教與漢僧經教音韻不同疑其有異命兩

土名德對辯一一無差帝曰積年疑滯今日決開故

法寶  
勘同

帝以佛教為心厭化胡偽造歷代斷除莫之遏絕嚴行  
天下焚毀無遺

釋迦如來真身舍利寶塔統御刹中計一十九所各頒  
錢帛廣加嚴飾大陳供養

帝嘗召羣臣云朕以本覺無二真心治天下國家如觀  
海東青取天鵝心無二故



帝每齋日以南天竺佛王置七寶珍羞澄湛觀心廣修  
供養

帝自有四海天下寺院田產二稅盡行蠲免普令緇侶  
安心辦道

天下寺院山林樹木徧諭王音嚴加護持毋令斫伐以  
嚴佛如來之境界

帝以俗制於僧失其崇敬徧諭天下各主綱維主掌教  
門護持佛法

臣下聞奏有俗僧人宜令同民帝令修補寺院以遮其過

帝主領天下頒降聖旨諭一切僧人不揀甚麼差發休當遵依釋迦牟尼佛道子行持

阿哈瑪特丞相奏天下僧尼頗多混濫精通佛法可允為僧無知無聞宜令例俗丹巴師父奏云多人祝壽好多人生怒好帝云多人祝壽好其事乃止

帝靈駕經宣德現大圓光周徧天界合境僧俗悉皆瞻

禮蓋顯古佛示現之作用耳

已上百段  
出弘教集

念常讚曰華嚴云菩薩住初地作大功德王以  
法化衆生慈心無損害統領閻浮提化行靡不  
及皆令住大捨成就佛智慧若欲廣分別億劫  
不能盡今觀弘教集載世祖皇帝實錄百餘篇  
字字句句以弘教為己任如有云朕以本覺無  
二真心治天下國家如觀海東青取天鷲心無  
二故由此論之萬幾之暇不離念佛念法念僧

苟非大聖慈念羣生特垂化迹能如是邪使唐  
虞再世亦無以加矣猗歟盛哉敬錄于前以曉  
來學云

乙未成宗諤勒哲圖欽明廣孝皇帝即位

初甲午四  
月十四日

十五日  
大赦 改元貞元年

丁酉

十月二十  
七日大赦

改大德

己亥正月遣使問民疾苦

壬寅三月一日大赦

大德二年九月一日五臺山大萬聖祐國寺真覺國師  
歿師諱文才字仲華楊氏其先弘農人高曾以來

缺

父靜義金季為清水主簿遂家焉少孤事母孝於  
書無所不讀性理之學尤其邃也故約而為

缺

文辭氣雅健如古作者為人沈厚若素

缺

與

士君子談接其辭辯其事詳其理盡出入經史滔滔然  
若河漢之決莫窺其涘其講授經論

缺

不屑屑

於名數嘗曰學貴宗通言欲會意

缺

意

缺

為得之矣

語言文字糟粕之餘也豈有餘

缺

文字味其

糟粕徒騁知見以記問自多

缺

其知穿鑿其

見愈惑多岐不能冥會於

缺

適足以熟耳而已

豈能開人惠目乎所著

缺

五卷

缺

論略疏三卷

惠燈集二卷皆內據佛經外援儒老託譬取類其辭質

而不華簡而詒微取其達而已

缺

成紀築室樹松將以

終老然以行修乎邇德加乎遠雖自韜晦其道愈彰人

尊其德不敢名以

缺

堂稱之佛教之興始於洛陽白馬

寺故稱釋源其宗主歿詔以師繼之世祖嘗以五臺絕境欲為佛寺而未果也成宗以繼志之孝作而成之賜名大萬聖佑國寺以為名山大寺非海內之望不能尸之缺其人於帝師迦羅斯巴會師自洛陽來見帝師喜曰佑國寺得其人矣詔師以釋源宗主兼居佑國師見帝師以辭曰某以何德猥蒙恩寵其居白馬已為過分安能復居佑聖願選有德者為之幸憐其誠以聞於上帝師不可曰此上命也上於此事用心至焉非女其

誰與居此吾教所繫女其勉之居歲餘大德六年將如洛陽道真定館于某寺疾作九月一日歿年六十有二火後獲舍利者數百粒其徒歸葬於五臺東山之麓

癸卯

三月十六日詔定賊罪條例為十二章及增給朝官月俸外任公田祿米等八月六日太原平陽

地震

大德七年丹巴金剛上師歿師名恭噶喇實即此云普喜名聞又名丹巴此云微妙西番托果斯塔瑪人幼孤依季父聞經止啼知其非凡遣侍法王上師試以梵咒



隨誦如流曰此子宿積聰惠異日當與衆生作大饒益  
年十二訓以前名自是經科呪式壇法明方靡不洞貫  
年二十四講演大喜樂本續等文四衆悅服上師令師  
至西天竺國叅禮果達木實哩習梵典盡得其傳初世  
祖居潛邸聞西國有緯里嘉勒幹道德願見之遂往西涼  
遣使請於奎騰大王王謂使者曰師已入滅有姪帕克  
斯巴此云聖壽年方十六深通佛法請以應命至都旬日  
即乞西還上召問曰師之佛法比叔如何曰叔之佛法

如大海水吾所得者以指點水於舌而已問答允稱上  
喜曰師年雖少種性不凡願為朕留當求戒法尋禮為  
師師入中國詔居五臺壽寧壬申留京師王公咸稟妙  
戒初天兵南下襄城居民禱真武降筆云有大黑神領  
兵西北方來吾亦當避於是列城望風歛附兵不血刃  
至於破常州多見黑神出入其家民罔知故實乃瑪哈  
噶拉神也此云大黑蓋師祖父七世事神甚謹隨禱而  
應此助國之驗也乙亥師具以聞有旨建神廟於涿之

陽結構橫麗神像威嚴凡水旱蝗疫民禱響應辛巳歲  
師得道藏化胡經并八十一化圖幻惑妄誕師乃嘆曰  
以邪惑正如此者遂奏聞召教禪大德及翰林承制等  
詣長春宮辯證

辨偽  
錄明

詔下諸路除道德經外其餘偽文

盡令焚毀至壬午師力乞西歸上不能留初僧格受師  
戒繼為帝師門人屢有言其豪橫自肆者師責而不悛  
由是銜之逮登相位懼師謹直必言于上乃先入巧言  
譖師故有是請首於雲中次至西夏以及臨洮求法盆

衆未幾權臣復譖令歸本國師至故里閱六寒暑己丑  
僧格遣使傳召還都於聖安寺安置四月赴省聽旨令  
往潮州師忻然引侍僧吹嘉勒燦子身乘驛即日南向及  
出都門雷雨冥晦由汴涉江泊于閩廣所至州城俱沾  
戒法八月抵潮陽館于開元寺有樞使允丹密實奉旨  
南征初不知佛其妻得奇疾醫禱無驗聞師之道禮請  
至再師臨其家盡取其巫覡繪像焚之以所持數珠加  
患者身驚泣乃甦旦曰夢中見一黑惡形人釋我而去

使軍中得報喜甚遂能勝敵由是傾心佛化師謂門人曰潮乃大顛韓子論道之處宜建刹利生因得城南淨樂寺故基將求材未知其計寺先有河斷流既久庚寅五月大雨傾注河流暴溢適有良材泛集充斥見者驚詫咸謂鬼輸神運焉樞使董工興創殿宇既完師手塑梵像齋萬僧以慶贊之嘗謂吹嘉勒燦曰吾不久有他往宜速成此寺後師還都奏田二十頃賜額寶積焉未幾召還僧格已伏誅矣癸巳夏五上患股召師於內殿建

觀音獅子吼道場七日而愈施白金五十錠叙及僧格  
譖師之語師以宿業為對宰臣莫不駭服上謂師曰師  
昔勸朕五臺建寺今遣侍臣巴延司天監蘇和卿等相  
視山形以圖呈師師曰此非小緣陛下發心寺即成就  
未幾上宴駕甲午四月成宗皇帝踐祚遣使召師師至  
慶賀畢奏曰昔青吉斯皇帝有國之日疆土未廣尚不  
徵僧道稅糧今日四海混同萬邦入貢豈因微利而棄  
成規倘蠲其賦則身安志專庶可勤修報國上曰師與

丞相旺札勒商議奏曰此謀出於中書省官自非聖裁他  
議何益上良久曰明日月旦就大安閣釋迦舍利像前  
修設好事師宜早至翌日師登內閣次帝師坐令必且  
齊朗宣勅旨顧問師曰今已免和上稅糧心歡喜否師  
起謝曰天下僧人咸沾聖澤元貞乙未四月奉詔住大  
護國仁王寺勅太府具駕前儀仗百官護送寺乃昭睿  
順聖皇后所建其嚴好若天宮內苑移下人間是年遣  
使詔師問曰海都軍馬犯西番界師於佛事中能退降

否奏曰但禱瑪哈噶拉自然有驗復問曰於何處建壇  
對曰高梁河西北甕山有地僻靜可習禪觀勅省府供  
給嚴護令丞相達實密上親染宸翰云這勾當怎生用  
心師理會者師的勾當朕理會得也於是建滿拉羅壘  
法作觀未幾捷報至上大悅壬寅春二月帝幸柳林邁  
疾遣使召云師如想朕願師一來師至幸所就行殿修  
觀法七晝夜聖體乃瘳勅天下僧寺普閱藏經仍降香  
幣等施即大赦天下上曰賴師攝護朕體已安即解頸



七寶牌為施皇后亦解寶珠瓔珞施之并施尚乘車輦  
騾馬白玉鞍轡金帛答刺黃白金各一錠官幣十八足  
御前校尉十人為師前導三月二十四日大駕北巡命  
師象輿行駕前道過雲州龍門師謂徒衆曰此地龍物  
所都或興風雨恐驚乘輿汝等密持神呪以待之至暮  
雷電果作四野震怖獨行殿一境無虞至上都近臣咸  
謝曰龍門之恐賴師以安癸卯夏師示疾上遣御醫候  
視師笑曰色身有限藥豈能留五月十八日師問左右

今正何時對曰日當午矣師即斂容端坐面西而逝上  
聞悲悼不勝賜沉檀衆香就上都慶安寺結塔荼毘王  
及四衆莫不哀惻是月二十九日勅丞相答失蠻開視  
焚塔見師頂骨不壞舍利不計其數輪珠坐氈如故回  
奏加歎勅大都留守率承應伎樂迎舍利歸葬仁王寺  
之慶安塔焉世壽七十有四僧臘六十二祕密之教彼  
土以大持金剛為始祖累傳至師益顯故有金剛上師  
之號焉

戊申武宗庫覓仁惠宣孝皇帝即位改至大

十一月廿五日大赦

瑞像計二千三百年矣

己酉造至大銀鈔

十月詔鑄大元通寶錢及至大通寶小錢十月十七日大赦

至大二年內翰趙孟頫奉勅撰臨濟正宗之碑

佛法大智慧破一切有以大圓覺攝一切空以大慈悲度一切衆始於不言而至於無所不言無所不言而至於無言夫道非言不傳傳而不以言則道在言語之外矣是為佛法最上乘如以薪傳火薪盡而火不窮也

故世尊拈花迦葉微笑一笑之頃超然獨得尚何可以  
言語求哉自摩訶迦葉廿八傳而為菩提達磨始入中  
國居嵩山少林寺面壁坐者九年達磨六傳而為能  
十傳為臨濟臨濟生于曹州遊學江右事黃蘗問佛法  
的的大意蘗便打如是三問三度被打辭往大愚理前  
話云不知過在甚麼處愚曰黃蘗恁麼老婆為汝得徹  
困猶覓過在師言下大悟歸鎮州築室滹沱河之上今  
臨濟院是也因號臨濟大師師之於道得大究竟繇臨

濟而上至於諸佛諸佛之下至於臨濟前聖後聖無間  
然矣直指示人機若發矢學者聞之耳目盡喪表裏無  
據自能後禪分為五唯師所傳號為正宗一傳為興化  
獎再傳為南院顥三傳為風穴沼四傳為首山念又五  
傳為五祖演演傳天目齊齊傳懶牛和和傳竹林寶寶  
傳竹林安安傳海西堂容菴容菴傳中和璋璋傳海雲  
大宗師簡公海雲性與道合心與法冥細無不入大無  
不包師住臨濟院能系祖傳以正道統佛法蓋至此而

中興焉當世祖聖德神功文武皇帝在潛邸數屈至尊  
請問道要雖其言往復紬繹而獨以慈愛不殺為本師  
之大弟子二人曰可菴朗贖菴儼朗公度華菴滿及太  
傅劉文貞儼公度西雲大宗師安公師以文貞公機智  
弘達使事世祖皇帝當是時君臣相得策定天下深功  
厚德福於元元卒為佐命之臣皆自此賢之也元貞元  
年成宗有詔迎西雲住天都大慶壽寺進承清問經歷  
三朝發摛玄言得諸佛智懸判三乘如一二數由是臨

濟之道愈擴而大今皇帝欽承祖武獨明妙心刻玉為  
印以賜西雲其文曰臨濟正宗之印特加師榮祿大夫  
大司空領臨濟一宗事仍詔立碑臨濟院且命臣孟頫  
為文稱揚佛祖之道以示不朽臣孟頫既叙其所傳授  
又系之銘銘曰佛有正法覺明妙心二十八傳至于少  
林赫赫少林師我震旦使為佛種不鏤而斷傳十世後  
而得臨濟為道坦然如指而示又十六世是為海雲坐  
祖道場能紹厥聞維我世祖誕膺天命威震九有維佛

是敬聞師之名若古賢聖嘗進一言深入聖聽不殺之仁其利甚弘俾大弟子為帝股肱至西雲公能嗣其業據獅子座為衆演說聞者讚歎信者鄉風得者如寶悟者如空今皇帝聖深契道要曰臨濟宗緊爾能紹即心即佛時廼世守傳不以言而以心受皇帝萬年正法永傳尚廸後人勿昧其原

勅賜奇塔特薩里神道碑趙子昂為文其畧曰太祖皇帝既受天命畧定西北諸國回鶻最强最先附遂詔其主



亦都護第五子與諸皇子約為兄弟寵異冠諸國自是  
有一才一藝者畢效於朝至元大德間在位之臣非有  
攻城戰野之功斬將奪旗之勇而道包儒釋學際天人  
寄天子之腹心繫生民之休戚者惟趙國文定公而已  
今上皇帝臨御之七年始行褒卹之典於是贈公祖父  
官爵勲封越明年復賜碑墓道命臣孟頫為之文當世  
祖時公為平章政事臣為兵部郎中趨走省闈識公為  
舊承言論政知公為詳敢不祇奉明詔公諱竒塔特薩里

早受浮圖法於智全末利可吾坡地沙圓通辨悟當時  
咸推讓之累贈純誠守正功臣太保儀同三司上柱國  
追封趙國公諡通敏又從國師八思馬學密乘不數月  
盡通其書旁達諸國及漢語世祖知其材俾習漢文書  
領之遂通諸經史百家若陰陽歷數圖緯方技之說靡  
不精詣會國師西還攜與俱歲餘乞歸省師送之曰以  
汝之學非為我佛弟子者我敢受女拜耶勉事聖君相  
泣而別比至闕師已上書薦之裕宗得名入宿衛日以

筆札侍左右至元二十年冬有二僧西來見自言知天  
象上名通象胥者數輩與語莫能解有托哩者言公可  
使立名與語僧乃屈謝不如上大悅明年夏擢朝列大  
夫左侍儀奉御秋置集賢館命公領集賢公請以司徒  
錫喇瑪勒領之乃以公為中順大夫集賢館學士兼太史  
院事明年夏遷嘉議大夫明年春升集賢大學士中奉  
大夫明年春進資德大夫尚書右丞並兼太史院事冬  
拜榮祿大夫平章政事兼集賢大學士太史院使廿八

年乞解機務以為集賢大學士三十年加領太史院事  
自初授官至是凡八遷並兼左侍儀奉御明年世祖登  
遐裕聖皇后命公帥翰林集賢太常禮官備禮冊立成  
宗即皇帝位明年春以翊戴功加守司徒大德三年復  
拜平章政事十一年春成宗宴駕哀慟成疾秋八月十  
有七日薨于大都發祥里第年六十三以是月日葬城  
西南岡子原

勅賜佛國普安溫禪師塔銘侍書奎章閣虞集撰其畧

曰師諱至溫字其玉一號全一邢州郝氏子也幼聰敏  
異常兒年六歲其母攜之至龐馬村見寂照和尚於淨  
土院寂照曰汝其為釋氏乎師心許之會寂照避亂去  
隱遼西迺禮寂照弟子辨菴訥而祝髮焉無還富公主  
淨土泣衆甚嚴師不以為忤庚寅之歲無還開法萬壽  
師與十僧同往佐之萬松某公以青州辨公宗旨開示  
法要門庭高廣四方尊之師見萬松始以才氣過人稍  
不容於衆然而博記多聞論辨無礙百家諸子之言多

所涉獵又善草書有顛素之遺法年才十有五為萬松侍者凡萬松偈頌法語一聞輒了之遂得法焉常以侍者代應對談鋒之利不可犯時人已深期之故太保劉文貞公長師一歲少時相好也劉公厭世故思學道師勸之為僧同叅西京寶勝明公既而為世祖知遇侍帷幄為謀臣薦師可大用得召見與語大悅將授以官弗受曰天下佛法流通臣僧之願富貴非所望也留王庭多有贊益居三歲遣還出賜金資日用不計其費時憲

宗命海雲主釋教詔天下作資戒會師持旨宣布中外而輔成之世祖征雲南還劉公請承制錫師號曰佛國普安大禪師總攝關西五路河南南京等路太原府路邢洛磁懷孟等州僧尼之事刻印以賜師銳意衛教凡僧之田廬見侵於豪富及他教者皆力歸之馳駟四出周於所履必獲其志乃已自其門人或勸之少憩弗懈也憲宗末年僧道士有諍各為違言以相危上命聚訟於和林剖決真偽師從少林諸師辨之道士義墮剝

鬚髮者十七人道宮之復為寺者以千百計中統建元釋教大盛僧衆賴之甚思師之功焉而師遂納印辭職每歲官賜金修寺之外世味泊如也至元丁卯五月二十二日以疾終於桓州之天宮寺西向右脇而化當暑儀形如生更有異香三日火浴之心舌牙不壞衆庶睹其地深數尺猶得舍利云世壽五十一僧臘四十臣聞世祖皇帝聖度如天善馭豪傑自在潛邸至於混一海內天下之人材大小畢至以足其任使故其功業之盛巍



巍然赫赫然三代而下帝王未有或之及也浮圖氏以  
寂滅為宗而材器文辨如溫公亦豈常人之流哉敢叙  
而表之以見夫興王之運其人如此銘曰維昔世皇始  
理開平作其潛藩有宮有城顧瞻東隅泉甘土厚蜿蜒  
來止屬垣負阜命建仁祠龍光是名權輿來尸僧有豪  
英氣如虹霓辨若風雨縱橫凌厲莫敢侮世皇有為  
羣策是稽召見從容出其端倪善其利器俾反初服報  
德不回屹若孤鵠林林釋徒稟教以居孰為紛更入主

出奴天子有命存完去駁我馳我驅立折其角燕趙之  
間至於陝關我田我廬匪歸匪艱世皇御一民用寧一  
而釋之門既振既息時龍光師燕居弗馳散其緒餘為  
書為詩詩揚宗風書縱逸趣沛將有述棄而遽去維時  
名僧至於公卿有誄有辭失之若驚垂八十年英標如  
在誰知表之嗣者七代義舉有聞天子喜之史臣屬辭  
以係遐思

庚戌正月行使歷代舊錢。十月十八日大赦

太師魯國忠武王穆呼哩身長七尺虎首虬鬚黑面多  
謀畧雄勇冠一時與博爾濟博勒呼齊拉袞俱以忠勇  
佐太祖時號巴哩巴庫魯克猶漢言四傑也太祖行次東  
印度鐵門關侍衛者見一獸鹿形馬尾綠色而獨角能  
為人言曰汝軍宜早迴上怪問耶律晉卿楚才奏曰此  
獸名角觶音端日行一萬八千里解四夷語是惡殺之象  
蓋上天遣之以告陛下願承天心宥此數國人命實陛  
下無疆之福即日下詔班師

右出本朝  
功臣事畧

辛亥正月五日以上年十一月廿三日郊祀大赦

三月十八日登極大赦賜高年帛 四月禁使新舊銅

錢及至大銀鈔

革罷僧道衙門

論曰望五位以升階轉二依而就果者上乘菩薩也以  
四向一坐而證成三生百劫而彰號者緣覺聲聞也聖  
賢品級教有明文唯妙悟自心入佛知見者千聖尚不  
為何階級之有大教東被三百五十餘年後魏以趙郡

沙門法果為沙門統供施之不足又官品之遂授輔國  
宜城子忠信侯尋進公爵曰安城封官自果始也梁以  
惠超為壽光殿學士後周選僧道中學問優贍者充通  
道觀學士仍改服色隋以彥琮為翻經館學士唐中宗  
神龍二年造聖善寺成惠範惠珍法藏大行會寂元璧  
仁方崇先進國九人加五品並朝散大夫蓋以營像修  
造之功也尋加惠範正議大夫上庸郡公寺主至銀青  
光祿大夫俸料房閣已上同職官給玄宗卜平內難僧

清潤封官三品醫寧王疾愈僧賜緋袍代宗加不空三  
藏至開府儀同三司肅國公食邑三千戶辭讓數四不  
允空曰吾以法濟世不意垂死濫汚封爵故秩唯空為  
極矣宋金兩朝南北殊風而封釋官秩頗存典故然猶  
遵律印信未聞迨我皇元世祖皇帝混一海宇條網制  
度一出睿思謂以俗制於僧殊失崇敬諭天下設立宣  
政院僧錄僧正都綱司錫以印信行移各路主掌教門  
護持教法賴聖天子不負佛囑也然而稗販之流好爵

縻賢恃其所貴而貴之奔走伺候處污不羞以敲扑喧  
囂牒訴倥傯為得志不奪不厭致有囊加巴僧錄枉取  
栲栳山僧錢罔顧律行可謂師子身蟲也仁宗皇帝居  
儲宮日目擊其弊降旨除宣政院外一例革之是亦不  
負靈山付囑也於戲朝廷尚行於爵秩釋子乃競於官  
階官階無盡期貪愛無滿分胡不養其妻子跪拜君親  
何異織女七襄牽牛負輓者耶識達於此無取焉盛矣  
乎不空粉澤大教有功猶媿濫污今何人而欲假名器

哉

壬子仁宗文英武章皇帝十月廿九日以諸王入覲大赦

改皇慶

癸丑十月十八日詔科場以經義取士

甲寅正月廿二日改延祐大赦

十一月遣使經理江西江浙湖廣田糧

弘教佛智三藏法師入寂公濟農氏諱實喇卜衮楚克事  
上師珠喇齊學佛氏法善吐蕃文字頗得祕密之要世  
祖皇帝嘗受教於帝師帕克思巴詔師譯語辭致明辨允



愜聖衷詔賜大辯廣智法師河西之人尊其道而不敢  
名止稱其氏至呼其子弟皆曰此濟農法師家其為見  
重如此公昆弟四人公其季也總卅之歲依帝師帕克  
巴雍染為僧學諸部灌頂之法時有上士名喇溫布以  
揚瑪德沁密結特之要見稱於世帝師命公往學此法溫  
卜以公器偉識高非流輩比悉以祕要授之於是王公  
大人凡有志茲道者皆於公師而受焉帝師嘉勒斯賚巴  
鄂爾嘉勒以公之能薦之世祖詔譯諸祕要俾傳於世時

僧司雖盛風紀寢弊所在官吏既不能干城遺

缺

侮反為諸僧之害桂蠹桑癰雖欲去之莫能盡也頽  
波所激江南尤甚朝廷久選能者欲使正之以白帝師  
僉謂諸色之人豈無能者必以為識時務孰與公賢以  
詔授江浙等處釋教總統既至削去煩苛務從寬大其  
人安之既而改授福建等處釋教總統以其氣之正數  
與同列乖迕而不合公謂天下何事況教門乎蓋吾人  
之庸自擾之耳夫設官愈多則事愈煩今諸僧之苦蓋

事煩而官多也十羊九牧其為苛擾可勝言哉建言罷之以聞詔罷諸路總所議者稱其高公既得請迺遁迹壠坻築室種樹蓋將終焉至大中以皇太子令名至京師詔授光祿大夫司徒仁宗皇帝龍德淵潛之日嘗問法於公知公之賢既踐天位眷遇益隆詔給廩既館於慶壽寺詔公所譯皆板行之公幼而穎悟諸國語言皆不學而能自為兒人皆以為必成大器既長果能樹立致位三公雖以德藝抑亦遭遇於時也其始為佛誦其

言觀其義既涉其涯遂屬於深為人好賢愛能尤能取  
諸人以為善談論之際發其端已得過半之思故其所  
有皆以好問而致是以名勝之流皆從之游以師友相  
處延祐元年十月五日歿年五十有六其始疾也詔賜  
中統鈔萬緡俾求醫藥太尉潘王往眎疾焉既歿又賜  
幣萬緡以給葬事遣使驛送其喪歸葬故里門弟子相  
與建塔以表其歲壽安山雲麓洪公作銘有謂佛法之  
傳必資翻譯故譯梵為華或敵對名物或唯以義必博

通經論善兩方之言始能為之是以道安嘗謂翻譯微言有五失本三不易故非能者不足以有為也所以傳列十科翻譯居首者豈非以其為之難功之大乎予嘗以詔與京邑諸公校讐藏典歷觀自古翻譯之家以義譯經如秦之羅什譯論唐之樊公十數人之作所謂禹吾無間然矣其餘或指義曖昧或文辭踈拙夫義之曖昧蓋譯者之未盡文或踈拙潤色之失也因思安公之言以謂以彌天之高尚稱不易今之譯者何其易哉自

季葉以來譯場久廢能者益寡豈意人物凋殘之際乃見公乎觀其所譯可謂能者哉

秦州普覺法師卒教自隋唐之後傳者各宗其說遂派而為三由止觀之門觀假而悟空觀空而趣中以入於實相者為天台宗會緣入實即俗而明真者為賢首宗窮萬有之數昭一性之玄有空殊致而同歸乎中道者為慈恩宗師為慈恩宗者也姓趙氏諱英辯垂髫為驅烏甫弱冠資二百五十戒二十有五得傳於栢林潭公

為座主凡為僧六十有一年年六十有八延祐元年六月庚戌終於景福寺煥異景於易簣之夕標奇迹於火葬之餘以其年月日塔於晉覺寺之後師為性真純如美玉含璞雖不加雕繪而人自愛重之至於悍卒武夫亦能敬其人謂無佛之世足為佛也每得錢幣悉以瓶佛祠食守道之侶故君子高其風

乙卯三月遣使宣撫問民疾苦

平寧都寇十一月廿七日以星芒大赦

天下

丙辰禮袞噶諾爾布喇實嘉勒燦巴勒藏布為帝師  
勅建旃檀瑞像殿記翰林承旨程鉅夫撰文曰蓋聞道  
非有象作易者必擬諸形容法本皆空度世者暫資於  
色相謂如指空為鏡不若以鏡而喻空即樹占風將使  
識風而忘樹是以雙林付囑舍利以凡聖而徧分千輻  
經行足跡亘古今而常在非炫神通於幻境實開方便  
於迷津所謂由自以會心即心而即佛者也旃檀瑞像  
者佛之真像也其猶萬影沉江如如不異孤光透隙一



一皆圓夫豈擇地而容蓋以隨緣而應望梅林而止渴  
靡不同沾泛竹葉以言歸誰堪共載惟我聖天子道躋  
先聖慈等覺皇祝長樂之春秋恒依佛地企如來之歲  
月坐閱人天爰命集賢大學士李衍及教禪耆德叙具  
本末乃云釋迦如來淨飯王太子生於甲寅四月八日  
是為成周昭王二十四年既生七日佛母摩耶夫人往  
生忉利至四十二年太子棄位出家修道穆王三年癸  
未道成八年辛卯思報母恩遂升忉利天為母說法優

闐王自以久失瞻仰欲見無從乃刻旃檀為像目捷連  
慮有缺陋謬躬以神力攝三十二匠升忉利天諦觀相  
好三返乃得其真既成國王臣民奉之猶真佛焉及佛  
自忉利天復至人間王率臣庶同往迎佛此像騰步空  
中向佛稽首佛為摩頂授記曰我滅度千年之後汝從  
震旦廣利人天由是西土一千二百八十五年龜茲六  
十八年涼州十四年長安一十七年江南一百七十三  
年淮南三百六十七年復至江南二十一年汴梁一百

七十七年北至燕京居今聖安寺十二年北至上京大  
儲慶寺二十年南還燕宮內殿居五十四年大元丁丑  
歲三月燕宮火尚書舒穆魯公迎還聖安寺居今五十九  
年而當世祖皇帝至元十二年乙亥遣大臣博囉等四  
衆備法駕仗衛音伎奉迎萬壽山仁智殿丁丑建大聖  
萬安寺二十六年己丑自仁智殿奉迎於寺之後殿世  
祖躬臨大作佛事計自優闡王造像之歲至今詔述延  
祐三年丙辰凡二千三百有七年噫四大海中頓覺業

風之息一彈指頃不知賢劫之過嘉與含靈從茲安隱於是集賢大學士臣顥以所述上聞有旨授臣鉅夫為之記夫謹奉詔言曰古之聖人教民報本追遠之道而於祭祀之禮廟則木為之主祭則孫為之尸後也乃有像設焉而不知其所由始由斯觀之其原於西域之俗也與夫佛為世出世間之尊又何竢於贊述然欲知佛之為佛固不在於色相而況於其似色相者乎然苟不自其似而求之又將無所措其歸向之心是故法身無

相必假相以表真至道絕言亦因言而偕妙若於粗者猶拳拳而思焉則其進也殆庶幾乎陛下考百王之度酌羣言之蘊上以惇孝下以施仁蘄於厚天下者無所不用其極至於軌仁於善以輔政教之所不逮亦因天下之心而為之而非若彼內祠祔祝者之為也夫以金石之捍堅猶未能必可久今以一木之為而綿歷若此然而佛之自衛固甚周而人之保之也抑豈一手足之功哉嗟夫邈延二千有奇至於陛下然後發德音經紀鴻

烈非緩也熙明之治至是而始隆雖典祀之外猶必以斯文文之也然則化之漸被者廣矣不其盛與記洛陽之伽藍筆多慚於董史頌西方之無量壽共祝於堯年莫測真如徒欣聖際謹記

是年封普庵禪師加號其詔曰上天眷命皇帝聖旨朕聞佛氏以空寂為宗則凡學所遵者寧欲建名號殊稱謂以示天下後世哉而國家非此無以昭尊德樂道之意也朕自即位以來聞袁州路南泉山慈化禪寺普庵

寂感妙濟真覺昭呪大德惠慶禪師紹臨濟之緒超華嚴之境德映當代澤被方來其道甚尊顯心切慕之既累錫大謚唯塔號未稱可加定光之塔曰定光靈瑞之塔者主者施行

丁巳正月十日大赦

勅加東林遠法師號妙覺  
寂光宏辨大師都省咨文

京都崇恩福元謙講主卒公諱德謙姓楊氏寧州定平人幼為勤策從僧讀佛氏書長時周游秦洛汴汝諮訪先德學芟蕪之道又逾河而北觀風齊魏燕趙之郊初

受般若於邠州寧公瑞應於原州忠公又受幽贊於好  
時仙公圓覺於乾陵一公後受唯識俱舍等論於陝州  
頊公首楞嚴四分律疏於陽夏聞公凡六經四論一律  
皆辭宏旨奧窮三藏之蘊而數公並以識法解義馳聲  
四遠公皆親熏而炙之躋其堂而啜其馥故年未逾立已  
有盛名於時後至京師受華嚴圓頓之宗於故大司徒  
萬安壇主揀公之門揀以公博學多能甚器重之初以  
詔居萬寧寺後又以詔居崇恩寺萬寧成宗所敕崇恩



武宗所叛也兩居大寺前後一紀道德簡於宸衷流聲  
洋於海隅未嘗以寵遇顯榮為之志而改其素嘗語人  
曰畦衣之士抗塵世表苟不媿於朝聞夕死可矣尚何  
慕於外哉自以重居官寺久佩恩榮而浮圖之道恬退  
為高乃以讓其弟子退居幽僻謝絕人事括囊一室以  
樂其道延祐四年正月廿八日終於隱所世壽五十有  
一為僧四十三夏宰臣以聞皇太后賜錫五千緡賻葬  
勅有司備儀衛集京畿諸寺幡蓋鼓樂以送之火後獲

舍利數十顆其徒建塔於南城之南

京城大普慶寺實相圓明光教律師入寂師諱法聞嚴氏陝西人按姓氏畧嚴與莊皆辛姓楚莊王之裔以諡為氏避漢明諱改氏為嚴公年七歲從禪德輝公學十有五雜染為僧年二十受具戒於是游汴汝河洛歷諸講肆研究教乘從大德溫公學法華般若唯識因明及四分律溫以公任重道遠克振吾宗託以弘傳之寄嘗對佛像灼肌然指庸表克誠刺血書經以彰重法遂隱

於臺山不踰閭者六載讀藏教五千卷者三番是以業  
進行修身藏名著帝師亦憐命公講說般若指授因明  
之要因顧謂其徒曰孰謂漢地乃有此僧耶三輔之人  
勸輝致書勗以兼善毋忘鄉梓請歸長安公以弟子於  
師義猶君父父師之命敢不敬承況父母之邦鄉里之  
義可遂忘乎迺抗策而西既至耆老皆驩呼而言曰吾  
鄉之人得所師而承教矣尋以安西王命居城南之義  
善寺唐初神僧杜順示迹之地也邠岐涇渭四序講筵

不絕從而學者蓋千數焉天子聞之徵至闕庭詔居大  
原教寺授榮祿大夫大司徒未幾詔居大普慶寺加開  
府儀同三司大司徒銀章一品賜遼世金書戒本求戒  
者皆從公而師受焉王公大臣皆仰止高風猶景星鳳  
皇之瑞於明時也延祐四年三月廿四日跏趺而逝以  
聞上惻然久之賜幣數萬緡以葬詔大臣護喪有司備  
儀衛旌蓋送之世壽五十八戒陂四十三弟子奉遺骨  
舍利建塔焉

戊午特賜三藏佑聖國師達勒巴入寂佛法流於中國  
久矣三乘之教風靡九州其道至焉唐宋間始聞有祕  
密之法典籍雖存猶未顯行於世國初其道始盛西鄙  
統元中天子以大薩斯嘉法師有聖人之道尊為帝師  
於是祕密之法日麗乎中天波漸於四海精其法者皆  
致重於天朝敬慕於殊俗故佛氏之舊一變於齊魯國  
師名達勒巴少為苾芻凡事帝師十有三年出而從入  
而侍聽言論於左右觀道德於前後陶熏滋久鬱成美

器凡大小乘律論及祕密經籍部以十數皆耳於口授  
目於手示得乎理之所歸行之所趣帝師西還送至臨  
洮以久勞侍從弗堪跋涉之勤見留於洮師留是十有  
九年依大士吹斯嘉勒旺布覆所既聞受所未傳切磋琢  
磨於是義逾精道益明矣是以譽延兩京道重三朝事  
二聖於潛竭勤逾紀從屬車往返二都雖雨夕風朝恒  
在宮壺逮武宗踐祚上處春闈眷藩邸之舊錫賚以千  
萬計初師在臨洮秦人請居古佛寺至是乞歸以所賜

大厥字謀老沙上未幾以太后詔徵還兩宮之賜眎前  
有加錫金印駝紐封號弘法普濟三藏大師延祐五年  
八月十六日化于京師年七十有三以聞上惻焉興歎  
久之兩宮賜幣以葬皇太子遣使致奠勅有師備儀衛  
送之都門之外謚佑聖國師給乘騎歸葬成紀焉

是年六月再立行宣政院叅用常選職官

己未勅建大永福寺

即青塔寺

二月朔日食

京師大寶集寺妙文講主卒姓孫氏蔚州人妙文諱也

九歲為浮圖年十有八畦服游學跋涉雲朔之墟觀風  
燕趙之邦二十一預芘芻戒抵京師依大德明公學圓  
頓之道陸沉于衆者積年三十有二以衆勸請之殷乃  
始赤服升猊就傳明之列其涵養冲挹無欲速成名不  
躁進求達類如此四十有八居薊之雲泉勤儉節用老  
者懷其德少者嚴其教故衆睦而寺治比再稔廩有餘  
粟歲荒以賑飢民薊人稱焉世祖聞其道召見之顧謂  
侍臣曰福德僧也詔居寶集時禪學寢微教乘益盛性



相二宗皆以大乘並驅海內相學之流囿於名數滯於殊途蔽情執之見惑圓頓之旨師獨大弘方等振以圓宗使守株於文字者有以盪滌情塵融通寂照是以龍象蹴踏競附一乘之駕焉年逾八十益倦于勤以寺任諸弟子退居逸老專念佛三昧延祐六年閏月閏日卒年八十有三告終之日誡弟子高聲唱佛名遽起跏趺結三昧印泊然長逝塔于平則門外

庚申正月朔日有食之

三月十一日登極大赦

辛酉英宗格根皇帝 改年至治

詔各路立帝師殿追謚曰皇天之下一人之上開教宣  
文輔治大聖至德普覺真智祐國如意大寶法王西天  
佛子大元帝師班彌怛拔思發是年勅建帝師殿碑光  
祿大夫大司徒太永福寺住持釋源宗主法洪奉勅撰  
翰林學士趙孟頫書叅議中書省事臣元明善篆額  
古之君天下者皆有師惟其道之所存不以類也故趙

以圖澄為師秦以羅什為師夫二君之師其人也以其  
知足以圖國言足以興邦德足以範世道足以參天地  
贊化育故尊而事之非以方伎而然也皇元啓運北天  
奄荒區夏世祖皇帝奮神武之威致混一之績思所以  
去殺勝殘躋生民於仁壽者莫大釋氏故崇其教以敦  
其化本以帝師拔思發有聖人之道屈萬乘之尊盡師  
敬之節諮諏至道之要以施於仁政是以德加於四海  
澤洽於無外窮島絕嶼之國卉服黽結之氓莫不草靡

於化風駿奔而効命白雉來遠夷之貢火浣獻殊域之琛豈若前代直羈縻之而已哉其政治之隆而仁覆之遠固元首之明股肱之良有以致之然而啓沃天衷克弘王度實賴帝師之助焉皇上重離繼明應乾承統以爲法位久曠道統將微以師猶子之子公哥祿魯斯監贊嗣帝師位俾修其法斂時五福祐我家邦有河西僧高沙刺巴建言於朝以爲孔子以修述文教之功世享廟祀而光帝師德侔將聖師表一人製字書以資文治

之用迪聖慮以致於變之化其功大且遠矣而封號未  
追廟享不及豈國家崇德報功之道哉大臣以聞詔郡  
國建祠宇歲時致享師薩思迦人族款氏祖道拉齊當  
吐蕃之盛相其君伯西海後十餘世皆以學德為國宗  
範師生八歲誦經數十萬言又能約通大義國人以為  
聖故稱拔思登長而學富五明故又稱班彌怛其所師  
而學焉友而問焉者數十人皆有盛名於時故其所有  
汪不可涯矣其所撰述皆辭嚴義偉制如佛經國人家

傳口誦寶而畜之夫敏者怠於博學貴者恥於下問才  
高而位重則矜已而驕物此人之恒也師以生知之明  
為天子師可謂敏且貴矣而乃博學無厭下詢遺老人  
有一法不遠千里而求之雖硜硜之諒佼佼之庸苟有  
可取無遺焉負絕世之材材莫大焉處帝師之位位莫  
重焉而乃孜孜於道循循誘物惟恐德之不修道之不  
弘未嘗以多能自聖而有滿盈之色曠若空谷靜若深  
淵遠若雲霞重若丘山豈非至德其孰能與於此哉其

道之所被德之所及猶杲日麗乎天明無不照陽和煦  
於物氣無不浹其高如天不可階而升也其大如海不  
可航而涉也以不言而民信不勸而物從所過者化所  
存者神匪天縱之將聖孰能與於此哉故天子法天地  
尚德右功之道著皇王之盛典崇廟享之報宜乎龜趺  
螭首刻頌遺烈昭示無極洪以狂斐猥承明詔序而銘  
之其銘曰佛道弘大洋海無際滔天沃日並育萬類於  
彼將聖象罔得一推厥緒餘以匡王國烈烈皇祖草昧

天造真是南紀功格蒼昊天錫睿哲俾翊我后敦彼薄  
俗化于仁厚汪濊漏泉波及無外航濬梯阻萬邦咸會  
羣邪鵠揚維鳩之競式遏詭類率俾吾正赳赳武夫蚩  
蚩嚚鄙德訓所及風振草靡惟月之恒惟日之升惟師  
之道罔或不承奕奕清廟惟時享之有偉其貌惟時仰  
之莫高匪山莫深匪淵刻銘頌烈永世無遷

五臺山大晉寧寺弘教大師性講主卒公諱了性號大  
林武氏惟古因生賜姓胙土命氏公之先莫詳世系然



考之命氏之原武子姓其後邑于宋宋武公之後以謚  
為氏公少好學聰敏之性殆天啓之依耆德安公為浮  
圖既登其歷諸講席探賾經論研精祕奧始遇真覺國  
師啓悟初心既而周游關陝河洛歷汴汝唐鄧放于襄  
漢尋幽覽勝以博其趣所至必訪其人詢至道之要其  
所師而學者如柏林潭公關輔懷公南陽茲公皆以義  
學著稱及歸復見真覺於隴坻愈見牆仞之高堂室之  
奧乃曰佛法司南其在茲乎後從真覺至臺山真覺歿

北游燕薊晦迹魏闕之下悠悠如處江海之上與世若  
相忘焉然以懷璧之美被褐而莫掩名既喧於衆口聲  
遂聞於九重會萬寧既建詔公居之至大中太后敕寺  
臺山寺曰普寧以茲擅天下之勝住持之寄非海內之  
望莫能勝之故以命公公居此山十有餘年而歿公為  
人剛毅頗負氣節不能俛仰隨世媚悅於人雖居官寺  
未嘗至城府造權貴之門或謂公少和氣公曰予以一  
芥芟芻天子不以人之微處之大寺惟竭誠夙夜匪懈

圖以報國而已夫何求哉必有臧倉毀鬲之言蓋亦營  
營青蠅止于棘樊耳顧予命之不遭道之不行納履而  
去之何往而不得於道乎時國家尊寵西僧其徒甚盛  
出入騎從擬迹王公其人赤毳毳冠岸然自居諸名德  
輩莫不為之致禮或磬折而前摠衣接足丐其按頂謂  
之攝受公獨長揖而已或謂公傲公曰吾敢慢於人耶  
吾聞君子愛人以禮何可苟屈其節而巽于床自取卑  
辱乎且吾於道於彼何求哉彼以其勢自大而倨吾苟

為之屈焉非諂則佞也焉有君子而為佞諂之行哉識者壯其氣以謂如佛印元公之遇高麗王子可謂識大體而得乎禮矣至治元年九月三日歿於普寧寺既火化以舍利塔于竹林之墟

壬戌故榮祿大夫司徒大玉山普安寺住持幻堂嚴講主卒公康氏成紀人諱寶嚴字士威號幻堂父某以罹喪亂棄俗為僧昆弟六人公其季也少以邁往之氣不樂處俗與其弟金薤染從佛求出世之道每逢名德啓

講必往聽而問焉嘗謂學而不思思而不學君子所憂  
雖通其說而不通其宗是學而不思也豈稱達者哉況  
文字之學守株象迹惑於多歧焉能涉同歸之海造圓  
頓之奧乎聽其說固辯矣觀其所得則未也於是既問  
而學之以博其趣而益致其思焉是其所以造詣蓋得  
之繫表故其講說深有宗通理味後嗣真覺國師傳賢  
首宗教以師承既高見解益明其方寸之地湛如止水  
瑩若明鏡物我相形輒影見於中雖以天資之高而德

罷之美抑亦師友玉琢蘭薰而致及真覺以詔居大白馬寺公與金從至洛汭及居大萬聖佑國寺又從至臺山真覺歿詔以公繼其位後公以太后詔居大晉安寺詔以金繼公居佑國寺公於至治二年七月閏日歿年五十有一詔復以金居晉安寺金以公之喪葬東封谷之口建塔以修祀事焉

癸亥至治三年八月十四日天目山中峯卒勅謚普應國師法雲之塔奎章學士虞集奉勅撰銘其畧云天目

之山有師子岩高峯妙禪師居之設死關以辨決衆學之士望崖而退者衆矣得一人曰本公是為中峯和上師生有異徵為童兒嬉戲必為佛事稍長閱經教然指臂求佛甚切晝夜彌勵困則首觸柱以自儆期必得乃已及入死關密叩心要誦金剛經至荷擔如來阿耨多羅三藐三菩提處恍然開悟自謂所證未極勵精勤苦咨訣無怠及觀流泉乃大發明師亦閱而不聞自是說法無碍高峯將戢化權遂書真贊屬諸師云我相不思

議佛祖莫能視獨許不肖兒見得半邊鼻其授受不虛  
若此著書若干卷行于世仁宗皇帝聞而聘之不至製  
金紋伽黎衣賜之號之佛慈圓照廣惠禪師賜師子院  
名曰正宗禪寺云云師諱明本宋景定癸亥歲生錢唐  
孫氏年六十一僧臘三十五化於其山之東岡

是年四月賜瀛國公合尊死于河西 詔僧儒金書藏

八月四日上崩

甲子改泰定



丁卯帝師袞噶諾爾布喇實嘉勒燦巴勒藏布於十月

一日涅槃 九月十四日即位

戊辰年改致和為天曆元年

禮袞噶伊實巴綱喇實嘉勒  
燦巴勒藏布文國公為師

是年革行宣政院設立十  
六處廣教總管府以攝僧

己巳勅建崇禧萬壽寺於蔣山

庚午改至順元年 詔改建康為集慶路 勅建大龍

翔集慶寺

壬申伊埒哲伯皇帝 九月即位

大都妙善寺比丘尼沙哩勒巴克實卒師諱沙哩勒高  
昌人其地隸北庭其地好佛故為苾芻者多太祖皇帝  
龍飛漠北其王率所部以從帝嘉其義處之諸國君長  
之上待以子壻之禮海都之叛國人南徙師始八歲從  
其親至京師入侍中宮真懿順聖皇后愛其明敏恩顧  
尤厚成宗之世事皇太后於西宮以侍從既久勤勞之  
多詔禮帝師嘉勒斯齊巴鄂爾嘉勒為師薙染為尼服用之  
物皆取給於官又貶宮官例繼以既康武宗繼統仁宗

以太弟監國師朝夕於太后之側入而侍出而從所言  
必聽所諫必從睠寵之隆猶子姪焉內而妃主外而王  
公皆敬以師禮稱曰巴克實北人之稱巴克實猶漢人  
之稱師也仁宗之世師以桑榆晚景自謂出入宮掖數  
十餘年凡歷四朝事三后寵榮兼至志願足矣數請靜  
退居於宫外求至道以酬罔極太后弗聽力辭弗已詔  
居妙善寺以時入見賜予之物不可勝紀師以其物  
勑寺於京師曰妙善又建寺於臺山曰普明各置佛經一


藏恒業有差又以黃金繕寫番字藏經般若八千頌五  
護陀羅尼十餘部及漢字華嚴楞嚴輝和爾字法花金光  
明等經二部又於西山重脩龍泉寺建層閣於蓮池於  
吐番五大寺高昌國旃檀佛寺京師萬安等皆貯鈔幣  
以給然燈續明之費又製僧伽黎衣數百施番漢諸國  
之僧其書寫佛經凡用金數萬兩剎寺施捨所用幣數  
以萬計其積而能散施予不吝期積福於來生必至於  
佛地者皆人所不能也英宗之明以其有靜退之高眷

遇尤至每稱之賢以為知幾文宗即位今皇太后居中  
宮以皇妣魯國大長公主愛重於師有兄弟之義尤加  
敬焉至順三年二月廿一日歿年六十四葬南城之陽  
賜號真淨妙惠大師

臨壇大德律師汶公卒姓張氏諱惠汶歸德之偃武人  
也驅烏之歲依耆宿釭公為浮圖二十而進具從大德  
溫公受菩薩戒嗣法壇主恩公既而行業日隆道益著  
從學者益衆佛制凡為苾芻雖大節不虧而細行必謹

非法不服非時不食居處動作皆有軌則所以戒昏惰而防逸德也公齋戒既嚴護衣惟謹雞鳴而興坐以待旦乾乾終日惟佛是念雖道行旅宿三衣一鉢必與身俱制行雖高而無矯飾之節操存雖固而無詭徼之迹是以言而人莫不信動而人莫不敬兩河之間三監舊邑從化者蓋以萬數縑素相率而求戒法者憧憧接跡於途承一訓言莫不懽心感戴說法數十餘年升壇授戒四十餘會大臣接以師敬之禮至順三年十一月廿

二日歿年七十有三



佛祖歷代通載卷二十二